

LA NASEPNA CHU MUALSUA TA'N

“Nang vang chingthei tak in umzing in, haksatnate thuak inla, chanchinpha gen in pang zing inla, la nasepna chu mualsua ta'n” (2 Timothi 4:5).

Simtu dawitak, Lalpa Jesu min in chibai. Pathian puihuaina tawh kum 2022 sung ah i nasep ding dawl chiat uh a bul i pat tak ding uh ginchak a um hi. Khenkhat chu Lo bawl lam a hi thei, lekhazil lam a hi thei, sumdawanna leh service lam le a hi thei hi. Bang pen chu hitaleh, nasep bul i patsau sau tak uh tawh kitawn in i nasep chiat uh mualsua a hi theina ding in theitawp sua hitiu.

I nasep chiat uh i mualsua theina ding ua Bible in ei zilsak chu chingthei tak ah um ding leh haksatna te thawk ham ham ding hi a hi. Kumsin ah i bawl ngai sunzawm ding hi ziang leuhen le, tukum ahin chu kum dang sang ah lawting zaw ding in chitthei gua hitiu ti a hi chu. Kum lui ah i umdan leh i nasep dan te kha vak nungthil leuhen bang i sukkhial deu a um em ti he mai ding i hui a, zia mun chet ah khan panthak la in chingthei tak in malam kalsuan hitiu.

Chuleh, mi lawting i hi theina ding ah chun haksatna te thuak ding in i kisak a ngai hi. Haksatna i tiu hi khawvel ah mi lawting ten a paltheng tei tei uh a hia, nang leh kei hinle mi lawting i hi nuam ua leh haksatna hi zamsan mailo ah i paltheng ngam uh a ngai hi. Tukum ah i matchak ding ua ei kipia chu chittheina leh thawkzawna ti ding hi'n tin, zia matchak pawimaw tak pani mang a hi i nasep chiat uh mualsua gua hitiu.



Kochuam Huang

Office hawn thu

Manipur Area Office chu January 05, 2022 ah khan hawn pat a hia, Pathian lungsiatna zal in Staff te lak ah le haksatna umlo in kumbul chu kitup tak ah pat thei a hi.

Administrative Secretary thak

Rev. P.B. Zosaphara chu Manipur Area Administrative Secretary ding ah Synod in a guat dungzui in January 07, 2022 Simhaini khan Office a join pan thei ah, kipak a um khawpmai hi. Pathian in a hun tak zel ah a mi guat hi a khial ngai pua, ama le tuhun â ding ah i mamaw uh puitu fel tak a hi ding i kineppi u'i.

Pastor-te umna kichawn thu

Bialtu Pastor khenkhat kitheng kual a um ah, tuni tiang ahin Pastor leh Pro Pastor te chu a umna mun ding chiat uh luafel in induction bawltu ding ah kiguat te'n pha tak in kawidetna a va neipi chiat u'i.

Pension thu

Rev. K. Jama Vaiphei chu kum 2021 tiang ah i Kochuam sung ah Pastor na ginum tak ah a sep nung in a umna Lamka Pastor Bial in ngâina tak ah thaliam in, pension in a pawt tai. Tuhin, S. Munnuam Canal Veng Kochuam in a lawi hi.

Administrative Secretary Bialfan

Administrative Secretary hin Bial sung chawt ah hiatchian a ut ah, ahi'n bial pumpi chuan manlo ding a hi ziak in Pastor Bial Centre te a fang pan ta, a ban ban ah hung fang kual ding a hi.

Manipur Area Committee

February 9, 2022 a hin Committee Room, Synod Office, Aizawl ah nei hi ding a hi. Hotu thak ten i kochuam makhua ding ei vaihawm piak pankit ta ding a hiu.

GAMTHAK NASEPNA

Rev. K. Jama Vaiphei

*Changtêl Rom 10: 15 (a) “Sawl ahilo ua leh bangti’n Thu/
Chanchinpha gen thei di ahiu vem?”*

Pathian gam thawlawm i piak sin ua leh Gamthak a di khen sek maleu hin Synod chuam i hi nailo ziak un gamthak nasepna lam kai hi i gen kha bek puau va tuchung a hin “ HINNA VAK Editor pun thupi ei hun piak ziak in kipak um ka sa’i. Mizoram Synod pumpi ah chun i malaknau a um tham ah hilehle khenkhat in ziachu ei uh mawpuak phaklo gualah ngai pha beklo hileu hin i kilawm ui. Mizoram Synod i zawp masang ua i Mission field teu le Synod Mission Board in a lak leh ei uh hin Myanmar field leh Manipur field bep i etkaw! dan un a um a; ziana sun achun le tulai a munah semte’n a report lo ziak uh a h’em report di umlo zaw a h’em Gamthak nasep nalam pang i thip veng veng jiang tau va kumbul le hi Synod chuamah um dikuan cha le i hi ziak un anuai a gual hin vak lunggel thak gua’i tiu:

1. Ei uh pi leh pu leh nu leh pate- Ei suantute kha kua’n Chanchinpha a la gen a h’em? Lamka lamte haw chu hun bah’em ti a kipat in Kochuam min chuam² ala pu maleu Thado Kuki Pioneer Mission a kipan a nung lam ah NEIG Mission hung hi zawm, ziapat chu NEIGM apat NEIGM leh INDEPENDENT Kochuam a hung kikhensawn kit te gasua ahiu a. Khenkhatte chu American Baptist Mission te

apat Pathian thu hete le i um ui. Kua pawl apat he hita leu hin midang gensawna pat i hiat uh a hi.

Jesu nungzuite leh midang a ging masate kithezak in khawvel gam munchuam chuam in a la tangkopiu va; zia kipat chun khawvel a gingtu tamtak a hung um ah, Roman Catholic leh Protestant i hung kikhen limlai ua khan Catholic lam chun gamthim nasep na a ngai ngai in a chia piu va, ei uh

Protestant te chu i kisiamtuak sung un kumtamtak a hung lut a, vainung lampek in Gamthak/ Ginglote lakah Chanchinpha gen chu ahun panthak thei tau. Ei uh dinmun hile ziagual deu chu i hiu va Synod chuam i hung hi tak ua leh banggual ah panla ding i hiu vem ti ngaitua lawk hun a hi tai. Zia nading a chun Mizoram Synod nasep dan vak zil masa'i tiu.

i) Home Mission-

Mizoram sung ah cheng nam dang Brute, Chakmate leh Kol leh Vai a state sung ua govt. nasem leh kilaw ah umte huap in Pastor leh Evangelist te gawi in, School hawn piak angaina muna school leh Boarding te hawng in a sem ui.

ii) Kochuam mi hisa laka-

Ei Manipur gam ngai na in govt. School Aizawl khawpi sung in- High school te le a bawl ua, khawchuam chuam chuam in le Tualsung Kochuam malakna'n PES(Presbyterian English School) a hawng ua, a fee te la in a run ua, kumsin leh Synod Budget apat in Panpina le piak a hisek hi. Zia hin khawchuam chuama i Kochuam naupang

khangthak hung um zel te Khawvel thiamna leh Pathian Thu ah kaihuaina leh Kochuam mi hiding a siamna matchak phatak chu Kochuam skul te chu a hung hitai.

Mizoram ah govt. school pha tak ah a kainau ah bawn Mission School a phatchuam piu leh ei gam a ding in banggual in a phachuam diam? Zia ziakchun, Synod chuam i hi phat uh leh chu Hausate, govt. Ojate leh Kochuam te pangkhawm ah school hawi tak tak bawldaw theina lampi hung um mai thei a hi.

Zia gual ahin i unau Convention lamte'n Thingtang lam ah school hawi tak tak a bawl daw dan uh zil hung pha maithei din ginchak a um hi. Sunday school in thupha bangzat he maleu Khawvel thiamna a neilo ua leh Kochuam mi mattak leh Kochuam ngaina dinga khang hung umzel dingte siam chu tu khang ah umte mawpuakna (responsibility) a hi.

2. Awilo taktak te kiang ah-

Khrista min lamkhaklona mun leh henailo te kiang ah

Khrista hukdamna chanchinpha gen leh hiatsak chu ei uh a gingsate, a hemasate himakmaw a hi. Chanchinpha i genlo ua, i um muang pi hiat hiat ua leh i chung uh gik bep hilo in Pathian ngaikhawk ngaikhawkpilo hidi i hiu va, ei su mangthai- nam mangthai suak thei zing i hiu. Khawvel in nam thupi taktak ala um sau sau tau va, Pathian thu limsaklo leh a gin nung ua le Chanchinpha puanzak ngaisaklo te chu a masawn di gual un a masawn thei puau. Khenkhat vang chu a nam sulnung uh gendi umzawm talo te ahiu. Namdang te etsaknan-Meitei lakah gending in eihaw hi gamla takah a zia a am uh hekeilo te sangin i phachuam zawu. Eihw Sangah phachuam zaw di chu amau mi gingu masate kizilthiam sakah mat phatchuam guat di a hi.

Khaikhawmna-

Chanchinpha genna lam sui mite chun- *Evangelism 1, Evangelism 2, Evangelism 3* in a khen u'i.

Evangelism 1 chu eima chipite lakah- a pau i thiam sa, a nek leh chak i nek theisa, chawndan

khandan i hiatsa lakah Pathian thu gen a hi. Paul khan ama chipite Judate lak in thu a gen ah, a machal mama'i.

Evangelism 2 chu i pau leh ham leh khawsakdan kinaipi te eimi hichetlo te lakah Chanchinpha gen a hi. Ama chipite chetlo, a pau uh a hiat leh a chawndan uh a hiatsa, Greek mi Athen khawpi khan Paul inle a gen a; suklung lut didan ahe, a phachuam mama'i. NEIGM nuaiah semtu masate kha i unau kinaipi'u Mizote a tamzaw ala hiu va lawting a hi. Etsakna naipen in gendi hilen-

Naupanglon-Sanglel tang ah Rev. Zaithangpuia (Taite) lawtin ma ma na ziak kha ama Lushai Hills mi pute minsak ti umlona hung kipan himaleh-ei uh kiminsakte i hiu a het ziak ah- a chate Naupanglon Hausate a ban in a min sak sak ah, A khua Meithal di a chawk leh Hausate leh a khuapumpi leh a gamkai khan a ngaina'u a Pathian thu a awi mai uh a hi. Zia Chanchinpha zia kah chun nasatakin ma i sawn pha'u a hi. Sapte hawn le i pau i ham leh chawndan hung zilkawm

in haksa tak in a hung sem ua,
eimi gingu um masa sunsun
te kha mangchan lekha- A,
Aw bu leh eipau Bible, labu te
ei siampiak ua eimi te mama
Sawlechak leh Pastor leh Hotu
in mang in tu dinmun ei tut ui.
Ei un mi zâl nasatakah i zo ua
kuaten ei uh zâl a zo diam? A
thawn in la muu ah a thawn
in piau in ti ahia; tu tadi hin
tui luangdawko gual in um
maleu hin dan leh ami ah i
kuan dinguh, i sawl dinguh, i
pauchappiak dinguh, a Biakin
dinguh i sak piak dinguh , a
Bible leh La bu'u i suk piak
dinguh, a taksa'u buakkaina

pumah i hepi khawm dinguh,
a mitmawna dang dang uh
leh a dukdaklona'u zat chuam
chuam tawh Pathian in ei uh ei
pawm khawm gualah i pawm
khawm dinguh hung um in
ah. Tulaitakah Arunachal mi
leh Assam mi i student lui
teu Doctor, officer zat chuam
chuam um te leh Kochuamte
haw ban in i Kochuam leh
eimau ziaka Pathian kiangah
mitthi pumah kipakthu gending
a hung umbe kal ngakla a
um hi, eimau gamsung leh a
pawlam ah le.

Lalpan a thu malsawm ta hen !

THILPIAK MANTAM

Hun kiti hi nang a ding ah thilpiak lul pen a hi. Sum
tampi la lawdawki thei a, hun vang la siam thei pua la
lawdawki thei puai.

Mi kua a h'em khat la hun la piak hi la hinkhua bangtik
ah le la mu kit taklo ding pia la hi.

Ziaziakchun thilpiak lul pen mi la piak thei umsun chu
la hun mantam tak hi a hi.

~Rick Warren

MEDIA & KHANGLAI TE

P/P H. Lamthianmuan

Panglian Pastor Bial

Media leh Khanglaite ti thupi mangcha tulai khawvel changkang na'n sia leh pha eitun thei dan chawmcha'n vak thil khawm hitiu.

1. Khanglai leh khangdawnlai ti paumal kibang in mang leu hin, Khawvel International standard tak ah khanglai huamsung hi kum 15 – 24 yrs. kikal in eisut piak ua, ei kochuam in kum 15 – 40 yrs. kikal in i huap sak uh a hi.

Thupilte 20:29 na chun, “Khanglaite lopina chu a thahatnau hi ahi” atia. I Timothy 4:12,13 na chun, La khangdawng hina kuama'n hun musit ki'hen amabochu mi ettawn ding in nangmau ah thilpiak mathilna mang phachuam ding in ei hil bawh hi.

Zia i Pathian thu teu apat in, Khanglai hun sung hi chu thil mantam tak, manpha tak leh lul tak hun hi'in ei gen hi. Khawvel thil dan inle khanglai hun hi chu i thahat laitak, i hangsan laitak, i khawhiatna chim laitak, i thiltup (ambitious) masawn ding i hau laitak leh lungthim thupukna detdo laitak leh i vanglai nawpchen ut laitak a hi bawh hi.

Zia chu a hizing lai in, media lam ah khanglai ten

thil phachuam tak ah kilang masawn ding a um a, himaleh i pilvang lo uh a hi chun, thil phalotak ei tun khum thei hi. Etsakna; milak ah tatchuamna (alienation), lungkiakna (depression), chang tatna (isolation), kilak chuamna (withdraw from society) leh a dang dang ngawng (effect) phalo ei tunkhum thei hi.

2. Media – Media kiti chu midang tawh kikawm tuana ding ah matchak, bailam tak ah thupuatu khawl pakhat a hi. A nasep thei dan chu; chanchin thezak, suadawk leh muding in a thawtdawk sek hi.

Media hi a lawmpi ah gen in chi thum (3) in a khenthehi hi:- Print media, Broadcast media leh Internet.

a) **Print media** – Print media hi chanchin pawtu leh thezak

tu upapen leh luipen hi ding in gingchak a um hi. Khangluite a ding in zia print media khawl in a sutdaw midang tawh kikawmtua, kithuhiattua na ding ah chanchin bu (Newspaper), lekha bu (Books, Journals, Magazine) leh lekha puan hawpdawte (dissertation/thesis/seminar paper) mangcha thupuan nasepna pawimaw ma ma ala hizing hi.

Zia chu a hi zing lai in, khangthakte a ding ah chanchinbu kithiattuana thupawtu hi tulai khawvel ahin phachuam bek talo hileh kilawm khawp ah, Newspaper sim ditdet, Journals, Magazine, Research paper leh seminar paper natiang ah print media mang phachuamlo kitam ma ma in a hiat thei hi. A ziak chu, changkanna khawvel technology gadget in eitun khum tak ziak in i lungthim teu zosia eilua mang zo ta a hi.

b) **Broadcast media** – Broadcast media hi mit ah muthei leh bil ah hiatthei ding ah paungaina mangcha ngaithak thaw ding ah chanchin thupawtu khat a hi. Print media sang in a changkan zawk na a tam hi. Etsaknan Radio, T.V., Telephone, Video games, Music leh Mobile

Phone te apat hin chanchin kithiattuana mit ah mu ziang thei leh bil ah hiat ziang thei a hi ziak in khawhiatna a sutai ma ma ah, mimal nungchang leh hinkhua a thunun zo nasa khawpmai hi. Chuleh, zia media hi zik leh sim thiamlo te a ding in thupawtu hawitak ahia, chanchin kimchang zaw hiatthei leh muthei a hiziak in ngainat a um bik hi.

Broadcast media hi khawvel changkangna tawh kituak ah phachuam ma ma hileh kilawm napi in khanglai leh khangthak te lak ahin ngainat a chang zo diaklo a bang hi. Radio ah thu ngaithak leh T.V. programme ah channel chuam chuam lemchan thawna vakthil mai hin a lung uh awizo talo a bang hi. A ziak chu Internet khawvel ahin, mimal nawpsakna, utchakna leh thunei utna zawn chiat ah duthusam sukpitin utziak hiding in gingchak a um pen hi

c) **Internet** – Internet nasep theina hi a nasa khawpmai a, khawvel pumpi chanchin kithiattua theina, tu leh tu thiltung leh a pet pet ah thil muziang theina media chikhat a hi. Mang phachuam te a ding in, khawvel pumpi thu henuam te a ding in, i kawtkhak bul ah

naicha um, kikawdak gual bep hi a hi.

Internet zia in khawvel ah nasepna, nekhawlina, thiamzilna leh khan leh chawn dan natiang in changkang pithei thil phachuam tamtak ei zilti thei in ei thunun thei baw hi. Thilpha zil daw ziang theina leh hiatziang theina a hi zia in thil phachuam tak a bang hi, himaleh i matkhial ah a huntiang i hiatlo a hichun, khamnathei (drugs) gual in ei hisethei a, thil lau umtak manthaina eitun thei baw hi.

Internet hi khawvel pumpi kikawmtua theina dan (protocols) zui ah mitin in network access theina account mangcha kilutchil sek a hi. Zia dan (protocols) zuilo te chu fake id leh fake account apat in Cyber crime, Cyber bullying, Cyber attack a lutchil thei sek hi.

3. Media leh Khanglaite – Media leh Khanglaite ti ahin, khawvel thiamna, hiatna, pilna leh khawhiatna'n a siamdaw kihomat theina khawl changkang tak mai media hin khangthakte lungthim leh hinkhua ah mun a lualian ma ma a, hindan pangailo tak in a thunun nasa ma ma a hi.

Tulai kampau dan in i Idol tithei hial ding khawpin khanglaite lak ahin media ilutchil nasa khawpmai uh a hi. Zia hin thil phalotak a suadaw chu banghem iti leh, mani masialna, kidawi khawpna, challeng utna, midang ngaisaklo na, kimisakna, thumatlo nate hi a hi. Media ngainat zia ah zia te hawhin i hiatlo kal in i lungthim teu mun a luasuak zota a hi.

Etsakna pakhat vak genleu hin, Social media in a huam khak facebook, twitter, WhatsApp, Instagram leh a dang dang in a thiltup pen chu, lawi leh gual, sungkuan te tawh kithuhiat tuana mat ala hia chuleh, hiatzing thei ding thil tepte na'n le i mang phachuam uh a hi. Amabochu, zia social media enkawltu leh mangcha tu chu mimal tinte ihu ah, lim upload, status update leh mood dungzui ah timeline taklang zing hin, hiatphaklo kalin thil thuktak media hin ei thunun zota a hi. A zia chu, i lim upload te, i status update te, i mood dungzui ah timeline luasuak zing hin mimal kidawi khawp na, challeng utna, midang ngaisaklo ah ki misakna i taklang zawsek uh a hi.

I Pathian thu in a huatpen chu “Keima tilo pathian dang la biak ding” ti ahia, chuleh Sawlchak Paul in Timothy kiang ah hun nunung a chun Pathian ngaisaklona tung ding a genlawk gual hi a hi (II Timothy 3:1-7). Hun nunung a chun mimal ki lungsiatna, milak ah umchuamna, chang tatna, kilak chuamna leh mimal kingai pawimaw na te hî, gingu khanglaite lakin muthei ding ah a um tak ziak in, Gingu te pilvang ma ma angaitak zet ta a hi.

KOCHUAM KHANGLIAN ZEL AH MATHIL

*T/Upa Lamneimang
Guwahati*

Kum zâ liamta ah Gingu mi khat leh ni apat tu hun tiang ah kochuam hung khang let dan, District pumpi Christian gam ti thei tiang ah a hung um ziang dan te hi i ngaitua kha sek awm? I gam ah kochuam kipat lim lai ah Pathian thu in chi leh nam, pau leh ham thu ah gingu te ei khen zak lo dan te, pau leh ham leh nam min te ah kochuam hung pung hul hul dan leh, pau khat nam khat sung ziang ah le kochuam i kikhen zak naklai dan te hi i sut ngai sek uh em?

Thugin kibang, i biak Pathian leh i Pathian biak dan kibang, a gam leilung leh a sung ah cheng mihing te kibang, i nek leh chak kibang, i hui hiplut leh i nisa thuk kibang, i tuinak teu leh i tuanthu te’u haw le kibang, ziagual tuk ah kibatna nei, kilamdangna umlo te hi thu leh la, kivaihawmna leh leh kochuam masawmna lam ah te ngaidan, dawidan

leh makhua thil dan kibang in pheiphung suan khawm thei leu hin kilawm tak hi ngal in, a bung bung ah kihuichuamna nasa ma ma in, Gingu te lak ah pankhawm theilona nasa tak a um ta a hi. “Pangkhawm hatna” ti hi zing ngal in, i pangkhawm thei diaklo uh a hi. A ziak di hi ngaidan leh gen di nei chiat ngei hitiu. Ahin, bangziak ah, bang ti dan ah, kua ziak ah,

HINNA VÂK

bangthu zia ah, tite hawldaw ah a siamphatna nâ di tawh gen leh zikna mu di a tawm ma ma hi. Kichian takah hawldaw, gen leh record ah kawi sang in, hun chia zel ah thiltung (events) gual ah gen leh ngaizam mai dan in a um zaw, malam hun ah kikhen zakna hung tung zel lele a hi di mawng ah ngaina um in a lang hi.

Kum tamlo chia ta apat Pro Pastor lak thak leh Pastor namdet thak te list haw kha hawi tak ah en ah a profile uh a la zilchian deu ten ngaituana bang zat a h'em chu nei ngei hitiu. Kum naupang chacha, qualified tak tak, khawvel kitaitekna te ah le gual phazo mama di te hawn Pathian gam nasepna a hung tel zawk dan teu i mu in lungdam aum ma ma hi. Naupang maleu, kochuam lam ah chun, i mapuitu uh leh vaihawmtu ding teu chu a hingal tau a hi. Zia hin ngaituana i chia sau sak ngei uh gingchak a um hi.

A lui chu a thak in hung theng in tin, hun chiasa ah Kochuam in i thil tuak teu, masawmna ding, kochuam malam ding

thilna leh pangkhawmna ding khualna ah puitu masa te'n thachawlina, haksatna leh gimna a la tuak teu haw zal in, khangthak ten lungthim thawveng tak ah Pathian lalgam na sem thei tading ahiau. Kikaihuaina phazaw leh kivaihawmna dan fel tak mang in kochuam hung kaihuai in tin uh, malai ah buaina dan ah kilang tampi te haw kha zang tak ah chiapi hung hi ta ding a hi.

Kochuam hi gingtute a ding in society ahiloleh pawlpi dang zosia sang ah chuambikna, chungnunna leh lamdangna nei ah ngai a hi. Ginna zia ah pawlpi kidin a hi zia ah hipen in ah. Gam government thil dan a chun society chikhat, sep ding, tup leh ngim bik nei khat gual ah ngai a hi. Zia zia a chun kochuam pawlpi hi government hiatpi a chun Association of persons (AOP), Body of Individuals (BOI), Trust ahilo leh Non Governmental Organisation a h'em khat ah, Registrar of Societies office ah ki register ngai a hi.

Government hiatpi ah ki register theina ding achun Memorandum of Understanding/Articles of Association leh Rules & Regulations te haw piak lut a ngai a hi. Zia ziak hin ahi gam government in kochuam hi henla pawlpi dang dang te chung ah thuneina a neikhum theina hi. A dik tak ah chun kochuam in le Memorandum of Association i siamsa dungzui ah kochuam hi kienkaw, kipuihuai leh kivaihawm ding dan chu a hi. A tangpi in, i gam in zia gual ah ei siamsa dan leh dun te haw hi i ngaisak talaw pua, hun khat khat leh buaina, kupalna i tuak sek a hi.

Gingtu tawmcha, kochuam neucha apat khanglian zel ini i gam ah Kochuam lian pawl a sim kham ding tiang i la tung ua, thagau mangthai lainatna tawh Mission Field lian tawk tak le i la nei ua, Sekul hun khawp enkawl in leh office, bial chuam chuam leh field ah semtu tam tawk tak i la nei thei ta uh a hi. Ziagual tiang dinmun ah kochuam i tung thei nung un, a hun lai ah hotute

chun kochuam khanglian zel ah i pawimaw uh hi ah hiat ziak in Mizoram Presbyterian Synod ah ei la pui lut tau a hi. MPCS ah lut til apat tuni tiang in a zum lam sang in a pal lam in, a suk lam sang in a to lam in kochuam a khang lian zel ah lungdam a um hi. Office etkawlna lam, Bial etkawlna lam, kikhopna kikaihuai dan, sum lak lutna leh etkawlna lam, i committee dan leh thupukna fel tak siam na lam, hun mat dik leh mat thiam dan te, kikhawmpi na leh kisaklawkna nei dan te, mawpuakna ngaikhawkna lam ah te leh thiangtho tak tak Pathian biakna lam ah te, tuma sang ah i masawn zawk bep hilo in, kochuam mun tin ah um ten kitanggung tak in i zui thei tau a hi.

Zia haw zosia a pat hin, MPCS ah i um masang ah phatawk leh huntawk ah kikawina a la um ma leh a fel zolo leh a pha tawklo a um hi ti ei mu sak hi. Hotu masa ten kochuam khanglian zel i hinaw ah maban a ding ah a pawimaw te hi a la muchian ma ma uh

HINNA VÂK

a hi. Tuhin Synod piting ah langkai thei di dinmun tiang ah khang lian leh masawn thei in i um tau ah Lalpa Pathian i chung un a pha takzet hi. Pathian mapuina tawh Synod piting hung hi thut ziang ding i hi ziak un, thil tamtak hi hung kitheng thut ziang kha ding dan a hi. Taksa bak khat gual ah um ah khawsa zing lai, taksa pumpi khat hung kisuak ah tawi pan ngal ding ahi ziak in a nawpna le um in tin, ahin, gingchak sang ah haksaw zaw hi hung tam thei a hi.

England kumpinu in a gam awpkhum te amau kivaihawm ta dingah a nutsia ding kuan vel ua Kumpinu Sorkal buaina leh a zalen sak gamte buaina haw kha lungthim in a hung kilang thei hi. A tangpi in awpkhum ah um gam te haw hi democratic society a la hilo, leng thuneina nuai ah kivaihawm sek te ahiu ah, a awptu ahi leh vang, leng vaihawmna puksiat nung a, democratic society a pat democratic system ah hung kivaihawmte ahiu hi. Awptu gam ah democracy hi a tualto ahia, awpkhum gamte ahin

democratic system hi a pha pen hi ti ah zui sak thaw ahiu hi. A tualto na gam ahin a system hi awl awl ah hung khanglian zel ahia, a zui thiam mama ua, zui sak thaw gam ahin a thu hawisa ma ma ngal in a lungthim un a zui thei tak taklo uh a hi. MPC (Manipur area) hi MPC taksa bak khat ahia, kum sawmni hu hawi tak ah zilsak, pui huai leh etkawl ahi ta, synod piting ah a hung um nung in le kivaihawmna lam ahin chu a buailo taksan a um hi. MPC hi state khat sung ah um, state government kivaihawm gual khawp ah kivaihawm thei ahia, Manipur Area hi synod piting khat a hung hi phat leh state khat sung ah a tamzaw Hindu, Presbyterian hilo Kristian pawl lian hun khawp tak leh Presbyterian Synod umsa bangzat a h'em lak ah khat hung hi ding a hi. A tangpi leh a tamzawpi MPC chia gual in chia in a kivaihawm dan te zui thei himaleh, bang tiang a h'em chu tulai pau ah copy & paste i bawltheilo hung um ding a hi. Puitute'n guntak ah a hun et zui uh pawimaw leh kilawm.

Khawvel sorkal te hi a tangpi in bak pathum nei, a nasep uh chuam chiat a hi. Zia bak pathum te chu a nasep dung zui un, a gam dan bupi huapsung ah, Dan siamtu (Legislature), Dan kisiam te semdawktu (Executive) leh Dan kisiam leh kisemdawk te danzui ahi na em ti endiktu/thutantu (Judiciary) a hi. Kochuam hung khanglian zel hin, i hiat leh hiatlo kal in, zia government bak pathum ten a sep uh hi a la sem zing a hi. A kibatlona pen chu bak chuam chuam ah a kikhenzaklo bep hi a hi. Kochuam khanglian ta te sep leh bawl leh thuneina te hi ngainep thei ahi him him puai. Synod khat i hung hi phat leh kochuam in a zui leh sepzuiding dan siamtu, a semdawktu leh a dik leh diklo kikal ah thutantu chu hung himai ding dan a hi. Hiatna thukzaw nei, pilna nei, thil sui mi, ziltiltu leh a dang dang i pawimaw uh hung tam ma ma ding a hi. Mi khat leh ni pilna, thiamna, hiatna leh theina ah kingak thei hitalo him him ding a hi tai.

Kochuam kietkawlna ahin thil pawimaw pathum aum

ah, zia pathum te chu pakhat gualah um, kal kikim ah a kitawn lo leh a khang ding dan tak leh a hat ding dan tak ah khangtheilo leh hat theilo a hi. Zia thil pathum te chu Evangelism, Administration leh Finance a hi. Zia thil pathumte hi Khauhual zang thum khauhual khat ah kituak tak ah kihek lawm gual a hi. Hun chiasa, synod i zawp masang lam kha en ta le hin, zia thil pathum te hi a chia khawm ding gual ah kitup tak ah a chia khawmlo ziakin buaina leh haksatna te i tuak sek ah, i hat ding gual leh i detdo ding gual tak i la tung theilo uh hi in a lang hi. Evangelism lam i la ngaikhawk ma ma ah, nasa tak in evangelism lam in i khangto ua, a dang te ni ahin chu gen ding leh ettawn ding a tawm ma ma hi. Administration leh finance lam ah fel zawlona, buaina te nangawn Evangelism i melkhu sak uh ahi kha. MPCs bak khat ah i um nung uh zia thil pathum te hin kal kikim takah lam a hung zawt tak zia un i khangto dan le a hung hawi ma ma ta a hi.

HINNA VÂK

MPCS apat Synod piting ah langkai i hung hi phat uleh zia thil pathum i gen teu hi kibuktuak tak in i chiapi zo na diam uh? Tu hin a piting zaw leh thiamzaw te puihuaina in i um ah, ei le a thiam gual ah kingaina um in a lang hi. I keng ngei ah i hung ding ua, kingakna zawk ding a h'em, dawt zawk ding le um diaklo ah hiatna leh thiam dan kibang dual dual ngen i hung hi phat ua leh malai i buaina teu haw khan ei hung vetha kit diam? Tu tiang hin chu Pathian zal in kibuktuak tak ah kal i suan thei tak uh gingchak a um hi. A hin thil khenkhat vang i hiatzing ah pha zia thil pathum te ahin vak taklang hitiu:

Evangelism: Kochuam um lawna pen chanchinpha hi ngai pawimaw pen ah a pan zing ding a hi. Admistration bang gual ah hawi in fel hen la, sum laklutna leh a etkawlna kitup ma ma ziang leh le chanchinpha meisel a mit ahi chun a dangte pani ahin umzia nei puan a. Kochuam khanglian zel a hitheina ziak chu chanchinpha in ma a sawn ziak ahia, thagau

mangthai lainatna, va tak ah belamte chawp leh a hisel theina ding uh tui thiang, leh anpha piak leh hui thiang hipsak zing hi a pawimaw ma ma hi. Presbyterian phat dan, kivaipuakna phat dan, sum hau dan leh a dang dang te haw ha gen sang in chanchinpha ma hi tangkopi ah, thagau mangthai mat, nungtol kilekitsak, lungngai lungkham te pathianthu ah kipaksak hi ha bawl ma ma ding a hi.

Administration: Kochuam khanglian zel ahin administration pawimawna a kilang diak hi. Pathian gam nasepna kitup tak ah a chia zel ah gam lianzaw lak zel ahi theina dingah chun administration lam kitup a pawimaw hi. Tualsung kochuam, Bial, Presbytery leh Kochuam pumpi kivaipuakna leh kivaihawmna hi a kitup in a fel ding a hi. Mi khat leh ni zabawlna a h'em, mani thu dawi taklumatna a h'em, mi dang sang ah he zaw leh pil zaw ah kikawina te hi kivaipuakna leh kivaihawmna su khawlotu a hi. Kizatua dial

dial a phat zinglai in maipha hawl leh mani lawkna di hawl ti te, dawisak chuambik nei ti te hi administration hivei phalo tak a hi. Synod piting i hung hi phat ua leh a mi leh sa kitheng diaklo ding ahia, vaipua leh vaihawmtu vang ei uh hi ta ding i hi ziak un, zang tak leh fel tak ah a pha di pen zui chiat mai hileh dawi um a hi. Kilunggualna hi a phapen ah, a tamlam phasak zuithiam hi le a pha a hi. A theichan in kilunggualna a umtheilo hial ah thupukna siam tei tei ngai a hi phat bep leh vote mang ah thupukna siam a pha a hi. A chutilochun dawi umlo hial vote hawl na hung piang thei zing a hi. MPCs ah hun sawt tak um i hi tau ah administration lam hi chu kitup ma ma ding in kinep a hi.

Financial administration:

Kum chiasate ah finance report i et leh budget target khumkhel zo zing in i um ua, lungdam a um ma ma hi. Sum leh pai bei ah bangma kibawl theilo ahi ziak in, i kochuam plan, policy leh vision zosia lawtinna dingah a kingakna pen chu i

budget uh a hi. Zia ziak ahin financial administration hi sum muna leh a matna zik tuakna bep hilo in i kochuam pumpi policy siamna pawimaw tak a hi ziak in ngaikhaw ma ma ding a hi. Khawvel sorkal gual ah sia (tax) dawl ah budget siamthei i hi pua, ginna ah gingtute'n thawlawm a piak dinguh hisap ah budget siam sek i hi ziak in pilvang diak a pawimaw hi. Evangelism lam a hung chau ah, administration lam ah mipi muan ngamna a hung tawm chun, thawlawm le tawm maisek ahia, finance lam ah le a lawsam khat hung ki hi mai sek a hi. Kochuam khanglian zel a hi ziak in, sum leh pai le a hung tam hiai hiai ah, government in a hiat kham bang hung khawi ta i hi ziak in government lam ah i hi ding dawl te haw le fel tak ah bawl zel ngai ding a hi. Etsakna in Income Tax piak i nawplo ah Exempt hi i nawp chun Section 12A of Income Tax Act nuai ah ki register leh donor te a dingah benefit piak i nawp chun Section 80G ah register ding tite haw hi i ngaiven pai

uh ngai ding a hi. Scheduled Tribe te haw Income exempt himaleh NGO leh Society haw hi exempt hilo ahia, kumsin leh Income Tax Return file ding, tax piak sek ngai a hi.

Kochuam khanglian zel leh khawpi lam: Nidanglai deu a khan khawpi ah umte chu sorkal nasem ahiloleh student ahi tangpi sek hi. India sorkal in a economy a hung tha zalen deu nung Kum sawmni vel liamta vel ah pat hin private sector ah, a thiamdeu te leh a thiamzolo deu te, septhei na tamtak a hung um tak ziak in khawpi lam ahin i lut nasa ta ma ma uh a hi. Chun, government leh organised sector lam ah le sepna nei i hung pung deu deu ah, sumkawlvaina ziak ah khawpi ah khawsa le i um theita a hi. Khawpi ah umte chu income nei ngen ahi ziakun thawlawm le a tam deu thei hi. Thawlawm tam lam sang ah pawimaw zaw chu, kochuam kitup a umlo ziak in khawneu apat khawpi ah lut te hi thagaulam ah mangthai a bai ah, a chate khang vang un nasatakah mangthai thei a hi.

Thingtanglam leh khawpi neu zaw apat khawpi lianzaw lam ah lut zel hi hung pung deu deu di a hi ziak in khawpi lam ah kochuam dinmun ding hi phatak ah ngaisak a pawimaw hi.

Kochuam khanglian zel ahin i la ngaitua phak beklo a h'em i la buaipi khak ngailo teu thil tam khawp i tuak ding leh buaipi ding hung um zing ding a hi. Lam chuam chuam ah hiatna nei, thiamna nei te i pawimawna hung lian deu deu ding a hi. Theology lam ah chun i kitodel zo mai thei ua, secular lam ahin i member te lak ah full time semtu hikhello te haw i pawimawna uh hung lian deu deu ding in a lang hi. Khanglian zel hi ding in Semtute'n le zilding tam khawp hung um in tin, bang lampang hi ziang leh le nasep ding kipe te thanuam tak ah a zil ua a sep sek uh ngai ding a hi tai. Quantity ah i khang dung zui in Quality lam ah le i khang pawimaw a hi tai. Zia tiang ei puitu i Pathian un ei pui zing ta hen.

KOCHUAM LEH THIAMZILNA

Thupilte 4:13; 3:23

Tual Upa Dr. Soilalsiam

Principal RMHS

“Zilsakna chu tudet in la, thâsuak ta kin; chingtúp in, la hinna a hi ngâl a. Zia phat chuleh la kêng kisuilo in, bit tak in la lampi zawt tan la.” (Thupilte 4:13; 3:23)

Khawthang lamte thiamzilna (*Western system of Education*) hi Khristian Kochuamten a bul apat uh a hi ti lehin kigen khiallo ding a hi. Kochuam hi a din tîl apat in, sunglam apat leh pawlam apatte in gensiatna leh dodâlna chi chuam chuam ala tuak ngal ua; ziate chu lungthim khawhêtna, pilna leh thiamna chuam chuam mangin ala maitua sek ui. Kochuam ten thiamna tawh kithua in pawlam (sakhua dang) dodâlnate a pat in a ginnau a la humbit ua. Chun, sunglam a pat chetna/gensiatna chuam chuamte siamhawina ding in, a thugin uh chu khangthakte hetthei ding in, thiamzilna mangin a puangzâk uh a hi.

Kum zabi 8 leh 9 a pat in, kochuamten thiamzilna sikul (mission school); khawvel thiamna leh Khristian gindân zilsakna ding in, ala phudawk pan tau a hi. Khristian thiamzilna chanchin ah hiatzing tâk ding-khantona chu, thiamna sangzaw zilna mun (University) ala phudawu hi a hi. Kum zabi 12 vêl apat University hi Europe gam ah phudaw ala hi ta, kum zabi 16 vêl in khawvel mun chuam

chuam in a hung ki thezâk a hi. Missionary nasepna ahin le thiamzilna hin mun pawimaw tak a lua zing hi. Thiamzilna mang ah ginglote Pathian thu zilsak leh puihuai, hi tuni chan in mission field ah chiapi a hi.

Thuhilna leh zilsakna hi Kochuam hina pawimaw ma ma a hi him a, zia chu, Khrist hukdamna thu hil leh Pathian thu zilsak a hi. I kochuam in mathîl khat leh tup (principle) khat ah i nei uh chu thiamna ah khanto (skill development) leh mani kitodel (*self sustaining*)

hi a hi. Zia zia chun ginglete lak bep hilo in gingtute lak in le thiamzilna hin mun pawimaw tak a lua a, ngaikhawk zaw diak nalai le hin pha ma ma in a.

Thiamzilna umzia

Thiamzilna umzia a kimang pen leh a langsal pen chu Greek thumal educere apat kipan a hia, zia umzia chu ladawk ahia; mi ah kipat thilpha bang a h'em ladawk/suadawsak tina a hi. Mi zosia'n eimau ahin thil bang a h'em a pha i nei chiat ua; zia thil chu a umdân pangai achun, a kisel/a-ipmu (*inactive*) a hi. A hin, thiamzilna diktak chun zia chu, a ladawk/suadawk thei hi. Thiamzilna a umlo chun zia thilpha eimau ah kiselgu chu mattheilo in a umden mai sek hi.

Zilsaktu minthang Drever chun thiamzilna hi hitin ala gen hi; "thiamzilna chu hêtna, umchan leh khawsak dân siamna leh bawlphatna lampi/mun ahi". Thiamzilna apat chun hêtna hi, a zilte lak a thezâk ahia, zia chun umchan pha leh khawsakdân dik zaw a siam sek hi. Chun, Robert Hutchins chun, "Thiamzilna

in a tup chu zillaite hiatna piak bep a hi pua'n, amau â dingah thilpha kingaitua theina a neisak hi" a ti a hi.

Zia chu ahileh, thiamzilna chu mani a di kigêl theina, lawi leh pâi pha siam theina, mi dangte ngaitua didân ngaitua piaktheina, tunung haksatna leh thil hiatchianlote (uncertainty) laulona, kochuam leh kipawl-khawmna ah nawksaklo ah um theina, khua leh tui pha hitheina, mani kitodel theina leh ki muanngamna petu a hi.

Thiamzilna Pawimawna

Tulai Khawvel ahin thil zosia a kisâng zing a; atawi thei leh hinna neite bep hilo in hinna neilote le nisin in a kisâng danglam zung zung hi. Thiamzilna hi mihing - taksa, lungthim leh thagau ah dawpsâna ding a matchak phapên leh hât pen a hi. Thiamzilna hi khawdatdawna ding a kawtneu chabi gual ale gên a hi. Nei leh go haute le thiamzilna tawh a chiakhawm lo chun, a neiteu chu a damsung ngei unle midang a chang mai sek u a hi. Zia zia

chun, khawsak dân, lungthim leh thagau khanna ding in thiamzilna hi a pawimaw bep hilo in, a lo theilo a hi.

India danbupi a la siamdawktute ngei inle thiamzilna pawimaw dân ala het chian zia k un, thiamzilna lam sukhâtna ding hi danbu'n ala zia k lut uh ahi. Danbu Article 21-A na achun thiamzil ding ah thuneina (Right to education) a chuang a; zia hin gambung (state) zosian naupang kum 6 apat kum 14 kikal te hi a thawn ah thiamzilna a piak ding ti a hi. Articles 29 leh 30 inle nam neuta a dingah thiamzilna leh chawndan lam a chuang baw k hi.

Thiamzilna ngaisaklo leh kizil peilo mite â ding chun, khawvel ah a hung um zia k uh chu: ne ding, dawn ding, ki-hing ding leh thi ding chu ahi mai a. Zia gual bep ding chun Pathian in ei siam puai, ti hiat a kûl hi. Thiamzilna i ti hi lekha zilna bep hilo in, lam chuam chuam a um a, thil chuam chuam ah ledaw thei ahi. Zia gual ah huaplían ahi zia k ahin, ei uh a ding ah phachuam

thei di lam in a pawimaw dan ngaitua khawm leuhin.

Thiamzilna ding ah pawimaw

Thiamzilna hi a zilte a ding ah lungawi um hinkhua mattheina ding lampi ah puitu a hia. Umchan, hindân siamphatna leh thil hitheina (talent) pawdawktu, mimal leh khawtâng/kochuam siamphatu a hi. Mani kithununna, kingaitawmna, kidelna umlo ah buaina sukven tite haw hi a bîk tak ah Kristiante thiamzilna in a puakdaw ngei ngei di a hi.

Tuhun hi ki-elna khawvel a hi ta, graduate khat popo in nasepna a mu ziang hun uh kha a kichai ta, lawtinna ding a chun a pangaita sâng ah thiam zawk a kûl tai. Lekha zilte hin, nasemte hileu hin le, a thiamte lak ah pangthei ding ah, kizil hat zawsêm lote â ding in, lawtinna ding a haksa ma ma tai. Lawtinna ding ahiloleh challatna ding a chun thiamzil di leh dân zuidi tampi a um a, ziate lak ah pawimaw diak khenkhatte chu:

Tup kichian nei di: Manin sukpitin thei di, kiphu taw k -

HINNA VÂK

tup kichian tak nei ding ahia, zia thil tup chu ngaitua zing a, thiltup apat lungthim pêtmang saklo di a hi. (Thupilte 16:9 Mihing lungthin in a lampi ding a kiguanggal sek in, Lalpan vang a kalsuan ding dân a kawkmú sek hi).

Kûkal di: Hapan hi tup mualsua nading leh lawtinna ding a pawimaw bep hilo in, a sângtha thei ding umlo a hi. Thuak-hawi leh thiam thei ma ma te le, kûkalna lo in chuanguanna leh lawtinna a chang ziang diak puau. (Kolossate 3:23 Bangkim la hi tapo uh chu mihing a gual ah sêm lo in, Lalpa a ding gual zawn, thanuam tak in sêm un).

Haisan lodi: A tîl ah lawtinglo la hi maithei, hitaleh le haisan ziang lo di a hi. Thil pha ahi nâk leh sekdo leh ginum tak a pan tûn tûn mai di a hi. (Galatia 6:9 Thilpha hi chimchâk puai tiu; i kithâdâ lo uh chun, a hun tak in ât ngei ding i hingal un).

Chuam hi ngam di: Midang tawh kibanglo ah a chuam hî ngam a ngai hi. Zia hin

telchuam hinkhua (selective life) mat a kawk a. I gualngai lawi leh paite kiang a le i-i/ ka nuam puai ti a pawimaw hun ah ti ngam ding a hi. Chuam hî ding ti hi thil nuam ahi pua, mihangsan leh kimuang ngam mi hi a pawimaw hi.

Hun mat thiam di: Pathian in dawichuam umlo kêi ah mi zosia hun a kibang ah ei piak chiat a hi. Mi zosian nikhat in dakkal 24 chiat i nei ua, Lawtinna leh lawsapna hi zia hun i mat dân ua hin a kinga a hi. Hun i nei hi phachuam tak ah mattheina ding chun, kiguanggal tûp a, eima hatna lam leh chauna lam hechian ah, a phachuam thei di pen ah mat guat hâm ding a hi.

Mani kithunun di: Banggual nêk leh châk i ne em, banggual thilte i dawn em, dakkal bangzat i-ipmu em, smart phone banggual in i mang em, TV etnan hun bangchan i mang em, lawi leh pai pawlnan hun banggual i mang zo em, taksa kisawizawi nan hun bangchan i mang em tite haw hi mani kithununna hinkhua'n a latsak vek a

hi. Eima leh eima kizaw a pawimaw a hi. (Hebrai 12:11 Thununna thawklai in kipak um in a kilang ngai puan; thawkzaw nung leh vâng, sawinêm ah umte â ding in, dikna ga thamuan umtak a sua sek hi).

Pathian lau hinkhua: Lawtinna ding dân (survival principle) pawimaw pen chu Pathian lau hinkhua mat a hi. Zia hin thumatna, taksanna, leh diktatna a keng khawm vek hi. Thilpha, thudik leh lampi dik chu bang gualin haksam maleh zui ham hamte chu kuama a kisik ngai puau. Thupilte 9:10 na'n Lalpa lau chu pilna bul ahi ati gual in Chunglam a pat pilna chu a bukim pen ahi ngal a. Thupilte 4:18 na chun midikte lampi chu vâng zingkal khawvak, sun a hung hi masia a vak phat deu deu gual ahi a ti kit hi.

Zia a chung ah kigente bâk ah thil pawimaw- la tuak ngei ngei di haksakna chu -NANG la hi. La hinkhua ah buaina/dawtnate chu, NANG bep a dawnhuna la hi; la hinkhua ah haksatnate chu, NANG bep a

siampha di la hi; la hinkhua ah guanggalnate chu, NANG bep a siam tu (architect) la hi. La hinkhua khualzinna bangchan lawting thei ding la hem ti chu nang leh nang la kimudân ah kinga a hi.

Zia achung ah thiamzilna ah pawimaw i genteu hi thilthak a hi pua, zui theilo ding khawp ah haksam le ahi pua, thil nuam mama le a hi diak puai. Thiamzilna ah chia hât nuamte ahiloleh lawtin nuamte a dân vâng, zui tei tei a kûl hi. Ziate haw hin mimal, kochuam leh khawtang hinkhua ah nunchan pha a siam dawm sek a hi. Bang bawl leng ka khangto thei diam ti het ah khawsak thei chu mihing a dingah thil pawimaw tak a hi zing laiin, bang gual in i khawsa em ahiloleh i hinkhua i mang em ti hi a pawimaw zaw a hi. Zia thiamzilna ah pawimaw i genteu hi zuitheidi ding leh, taksa khawsakna ah khantona dingah matchâk leh kochuam leh khawtang phatzawmna dingah matchâk hitheidi ding in, Lalpan simtu zosia ei malzawl ta hen.

LA THAWK-HATNAU AH CHUN PATHIAN NGAISAKNA PANSAK UN

(II Peter 1:6)

*Rev. Thianginlim Vaiphei
i/c S. Munnuam Pastor Bial*

Thupi : La thawk hat nau a chun pathian ngaisak na pansak un. (II Peter 1:6)

Thumapui

Lalpa'n a lungdam kum 2022 ei puitung kit ta, Kochuam mi zosia te kumthak chibai. Zia i magazine dawim um tak mang ah hotu ten free sermon zik dinga ei hiat sak gual in lekha zik a h'em sermon a h'em hi ka thiam zawng hilo ma leh phul tak chungin ka thiam dan dan in " la thawk hat nau a chun Pathian ngaisakna pansak un" ti thupi mang in holimna nei ding ka hi.

La hiatnau ah chun kisumna pansak unla la kisumnau ah chun thawkhatna pansak unla, la thawk hat nau a chun pathian ngaisak na pansak unla.

1. La hetnau ah chun kisumna pansak unla. (I Timothi 6:8, Hebraite 13:5)

I Tim. 6:8, nek ding leh sil ding i nei ua leh zia chun lungawi mai hitiu.

Hebrai 13:5, La hindan uh chu êna panglo hihen; la nei dan un lungawi unla; ama chun, "Hun thatham puang a tin, hun nusia ngai puang ka" ati ngal a.

Eg. Alexander lopi : Mi du-am Alexander lopi chun

khawvel gam zosia a zawnung in zaw zel ding a um tak lo zia in a kap ah, nawp chen bawl in sawt lo cha a damnung in kum 32 mi bep ahi in athi ta a hi.

Dionysius a ding in kuangkang pi hi a lian tawk a. Alexander a ding in khovel hi a neu ta lua a hi.

2. La kisum nau a chun thawk hat na pang sak unla. I Korinth 4:1,2.

1) Keimau hi Krista nasem leh Pathian thuguk enkawl te gual in ei ngai un.

2) Zia enkawltu hi'na ah hin, mi ginum hi a kul hi.

Eg. Mi Kisum theilo:

Zu ngawl vei pa pakhat hi a zi nun a zu dawn ziak in a gai seka maleh apha chuam puai. A zi chu a lungdam ta pua, hun sawt tak a damlo nungin a thi vang vang ta a thi di kuan cha ahi ziak in a lupna kiangah chun a pawsal chu a kichu, bang hem la daw? La daw pen pen gen in bawl piak ingka atia, a zi chun le kipak tak in adawnhu ngal ta, kadoi pen chu ahi le la zudon kha ngawl in atia. Ama'n le, la khuta zu lei piak lo chun dawn ta puang ka a tia. A zi chu a kipak ta ma ma ah, a thingal ta. A zi luang kianga a chut zing lai in zu chu a hung du kit ah, No ah ava sungah, a zi khut in a kipiaksak ah a dawn kit tho tho a hi. Ei ma dawitelna hin sual a kizo theilo a hi.

Eg. A nu lungsiatna in a zo:

Nepal gamah chun, gambling kihel a khap ua, khatvei chu tanglak pani hi a kihel ua, police in a mantau ah. Pakhat chu mi hausa cha ahia, a pa'n a tandaw ta, pakhat chu migenthei cha ahia a kitandaw thei ta pua, suangkul ah a tangta a nu chun gim takin a sem a, a paisa a mu tawmcha cha te chu a chapa tatna din a khawl a, a sepgim

ma ma ziak in pitek gual mai ahi ta, puan luitak a sil a.

Zingkal khat chu tanglak chun suangkul inn a pat chun ama kiang lam zuan ah pitek hung chu a mu, a hung naiphath chun, a nu ahi ti ahe ta. Anu chun, ka chapa suangkul apat in la pawt theina dingin gim tak in ka sem a, tuhin, ka paisa lawdaw chun le a tandaw ding la hi atia. Atandaw ta.

A pawt nungin a lawipa Mihausa pa chapa chun gambling kihelpi ding in a pa kita, ama chu a nuam ta pua, "*Gambling ka kihel chun ka nu in a thwak gim sek hi,*" ti in a dawn hu a hi.

3. La thawkhat nau achun pathian ngaisakna pansak unla.

Eg. Pathian kiang ah thinlung pia:

Sir James Falshaw, tumalam a British Railway Company Chairman hi sek chu Queen Victoria lawipha leh a ngainat mi ma ma ahia. Paisa mat thiam ma ma mile a hi.

Nikhat chu ama chawihawina luai a theu a, zia hun lai chun kum 80 mi ahi ta tangval tam tak in hiat a nawp ziak un a lawtinna ziak

HINNA VÂK

pen thil bang a h'em vak gen nuam ahiloleh vak thuhil nuam a nei em tih a dawng ua. Zia putek chu ahung ding dawkah la dawt nau chu bailam takin dawnhu thei ing ka e! "Kum 15 ka hi lai in ka thinlung hi Pathian kiang ah kalan ta a hi, zia chu a ziak pen a hi." Atia.

Eg. Olympic a tai nuamlo:

Khrista leh a gam chawihawi tu-

Eric Tiddle hi Olympic games a pang ding in a chia a. Zia gual ah chu kihel dingah chia a hi zia kin a kipak ma ma a. metre 100 tai ding ahia.

Ki hiatsakna ahun tak ua, chawl ni a tai ding ahung hia, ama chun, "chawl ni ah chun tai thei puangka" a ti ta mai a. A manager pa chun la tailo le chu England mualpho khawp mai ding a hi chu atia. Olympic a kidemna him him ah chawl ni ahi ti le a um chuam puai. A um inle kigensiatna a um puai. Zia ziak ah chun la tai ding ahi

atia. Maleh a tai nuam diak puai.

News paper vel ah chun musit tak leh nuizat um tak in a um dan chu a sua tau a, maleh Tiddle chun Metre 220 taina ding a um ti ahia. Zia chu tai ding in a kipe ta. Tai dinga achia lai chun, mi pakhat hin lekha a hun pia. Lekha ah chun, "Ei chawihawi tu chu ka chawihawi ding" ti hi a kiziak ah. A lungthim in a vawp zing ta, tai na ding in githei a vak kap ua a tai tau a. A tailai inle ei chawihawi tu chu ka chawihawi ding a hi ti chu a vawp zingah, pakhatna ahi tai.

Nikhat ni mai ah England sumualpho tu leh a nuisan uh chu England leh Pathian chawihawi tu a hung hi ta.

Zia gual ma a chun ei unle Lalpa chu i thawkhatna'u apat in i chawihawi ding uh a hi.

Lalpa'n a thu malsawm ta hen. Amen!

"Eima'n i tukdet zia kin humbit ah um i hi puau ah, Ama'n ei tukdet zia kin a hi zaw a hi."

~ R.C. Sproul

KHRISTIAN HINKHUA AH KIDONA

Jacob 4:7 ; I Pet. 5:9

*-Upa S.Genmuanlal, Secretary,
Lamka South Presbytery*

Pathian cha diktak te chun diktak ah kalsuan a nuam jing ui. Kidona tawp theilo khawvel in I cheng ui. Khristian hinkhua chu galdona hinkhua a hi. Zia ziakah chun Khristiante chu “Pathian Sepaite” ti a hi sek hi. Pathian ngeile “Sepai hawnte Lalpa” a kiti sek hi (Isai 51:15, etc). Zia ziak a chun kidona chu Khristiante a ding in dawitelna ah kinga hilo in sep tei-tei ding mawpuakna a hi (Jacob 4:7 ; I Pet. 5:9).

Khristian hinkhua le kidemna phual (arena) gual a hi, ei hawn chu ginna a nei ah nei thaw, chutpi mai mai, kisaktheipi ma-ma hile'n kilawm; Kidemna um hun ah, pei ma ma lo, thep puk ah kium zel sek a hi.

KHRISTIANTE MELMA

Khristiante dotu melma chu Setan, Diabol le kiti ahia, ama'n matchak chi tamtak leh dodan chuamchuam mang in Khristiante ahun do zing hi (Eph 6:7, Jacob 4:7, I Pet.5:8). Khristian kiti zing ngal ah Setan dolo ah , Jesu matsakpa Juda gual ah Setan van matchak ah pan khak thei a hi. Nang Setan bang la law em? La do em, ahiloleh ama lam ah pang?

MIMAL HINKHUA AH DO NGAITE

Mimal hinkhua ah do ding pawimaw lawmpi ni (2) a khen in gen zawm hitiu.

I. Pianken mizia leh lungput tawh kisai:

Mihing lungthim putdan suithiam ten mihing pianken mizia chi-li in akhen ua, ziate chu –

- 1) Sanguine (maitai, pawluam, sua-ngal)
- 2) Phlegmatic (chanchum, nguai),
- (3) Choleric (hiamngam leh chan-gang)
- (4) Melancholic (maigum, chilgil, thilsuimi) a hiu.

Zia mizia chuam chuam te'n hawina lam leh hawilona

lam a nei kawp chiat ua, mi khat in khat sanga tamzaw le anei kawp thei hi. Etsakna : Sanguine mizia neite chu lawipawl thiam, zachatna neilo in, nasep khat po-po in malatu in a pang deu ui. Ahin lah, a kilawp gual un a lungke bai kit zel ui. Ti-takna a tasam tangpi deu ui. Zia ziak chun Galatia 5: 22-24 a thagau gate lak ah Thunuaigawlna leh Kisumtheina pawimaw ahi lam a kihiat ua, a delzui ding ua pawimaw a hi. Chun, pianken mizia dangte'n le hawina lam leh hawilona lam a nei chiat ua, mitin in mani pianken mizia hetchian ah, a hawilo leh Pathian thupina liatheite umpi mailo ah Thagau Thiangtho thununna nuai ah kawu ah zaw guat chiat ding a hi.

Mizia leh lungput hawilo Khristian hinkhua ah do pawimaw diak khenkhatte-lungchawm, thikthusia, ginumlo, thutaklo, huaihap, angmasial, mittam, diktatlo, khut-themnei leh a dang dang. Zia kigen mizia leh lungputte, Khristian hinkhua ah kilang ngeingei ding

“Thagau ga” (Gal. 5:22-23) kigente tawh kikal leh Pathian thupina daltu ahi ziak un do ding a hi. “Do” umzia diktak chu kituaklo ziaka chungnun kichu tina ahia, ziagual mizia leh lungput nei te'n eima ah mun aneilo himhim ding tina a hi. Pianken mizia a hi dungjui un mihing kisumhat leh kukal taka pan ziak ah zaw ding hilo in, Pathian thu leh Thagau Thiangtho panpina ziak ah zaw ding a hi zawi.

II. Chindan hawilote :
Pianken mizia hilo, eima'n i lakkawm leh chin zawngsak thil hawilo tamtak I hinkhua'u ah a um hi. ziate chu du-amna, khamthei, tawt thanguai, hiamngamna, nekjukna, gensiatna, nawptalna, pawsal- numei kal ah thangtatna leh a dang dang. Ziagual chindan te'n Pathian thupina a dal ban un a ching tute hinkhua le a suse ma-ma hi. zia chindan hawilote hi Khristian mimal chiat in do ngei ngei ah eima ah mun neisak guat lo him him ding a hi.

Pianken mizia leh chindan hawilote mangcha'n Setan

in ahun do jing ah, i guallel khakseu uhi thil khawktak a hi. Mihinglui pianken mizia leh thil chindan hawilote melma Setan a kipat ngawn ahiu a, Khrist ah thilsiamthak hitate tawh kizawpna neithe i talo him him (Rom 6: 1-14) a hi zia kun, titakna tawh do a ngai hi.

Mimal hinkhua ah Khristian galdona ah gualzawna chun kipakna leh chantawk ah lungawina a hun tut in, chanchinpha nasepna ah ga a

hun suasak in, Paul in a gen gual in “Kidona pha chu ka do zo ta’n, kitaisiakna chu ka mualsua ta’n, ginna chu ka vawpdet zo tai, tuhin dikna Lallukhuk chu kei a dingah kawisa’n a um tai...” (II Tim. 4: 7,8) ti thei tading i hui; tichun, thi ding lau leh leichung nawpsaknate khela gui gui lo in Hukdampa tawh kimaitua hun ding ngakla pen in neita ding i hui.

Pathian Thil Hitheina Midang Kiang Ah Taklat A Hi Theina Ding In Nang A Mamaw La Hi

*Pi Thianneilian @ Th. Ashy
Vice Chairman, CKNP*

Pathian a hina tak ah Pathian hithe i zing hinapi in, Pathian a hina zia ah thilmak leh lamdang a bawl na ding in NANG mamaw a hi ti hih la ngaitua tak tak ngailo maithe i hi. Nguntak in ngaitua vawng vawng leh chun, bangkim ah Ama beltute chialna zia leh a mittung a chate dawtna apat Pathian a hina a taklang sek a hi ti hi, i Bible apat munchuam chuam in muthe i himaleh ka lungthim ah kilang diak te apat hun suklat ka nuam hi.

1. Pathian in Mosi kiang in, “Ahi’n, nang in la mawl kha lâm inla, la khut chu tuipi chung in vak zâk inla, tuipi chu vak khen in” ti’n thu a pia, Pathian thupiak gual in Mosi chun tuipi chung ah a mawl chu lâm ah a vak khet chun, Israelte chu Tuipi lâitak ah chun lei hul chung in a chiatheng thei tamai uh a hi. Mosi khan a khut ah mawl kha tuipi chung ah lâm lo hial maleh Pathian in

HINNA VÂK

Tuipi chu a tingtan mawlo hial ding a hi. Himaleh, a matchak Mosi apat a thilhitheina suklat ding chu Pathian sumsalna lam a hipua, a mi matchak te ziak ah a lopina leh a thilhitheina suklat chu a lunglam tak ahi ti chu muthei a hi.

2. Lengpa Herod in kochuamte lak ah kuate a h'em chu a la hi'genthei ma ma in, Johan suapi Jakob khale chemjam in a la that ngei a hi. Ziagual ah a bawl kha Judate a kipak ui ti a hiat ziak in, Peter le mat ah Judate mitmu ngel ah tha kit ding a gua, a mat nung in suangkul ah khum in vengtu kitup tak a kaw hi. Zing khua hung vâk leh Herod chemsau ah thimai ta ding Peter dinmun chu banggual ah lauthawn um a hita diam ti la ngaitua ngai em? Mihing ngaituana'n vang pumpel thei ding gual chu a hi tapuai. Vengtu Sepai pawl li, pali chiat ah kisân sak zel lak ah zanthim nuai ah suachat ding dan chu, mihing ngaituana'n vang a umthei talo hial mai hi. Himaleh, Kochuamte'n Peter a ding ah chun phatchuamngai tak in Pathian kiang in a la

dawn ngut ngut ua, Herod in puidaw a guat zan tak ah chun Lalpa vansawlechak khat suangkul sung ah valut in Peter chu a va'puidawk ta a hikha. Lunggil tak ah kochuamte pauchapna hi Lalpa'n a ngainep him him puai ti muthei a hi. Chanchinpha puanzak zelna ah mi phachuam mama Peter kha, ama mimal dawitelna in Lalpa'n suangkul apat a puidawk thei ma ma hi. Puidawk thei puana ti in vang ginlelna him him ka nei puai. Himaleh, Phatchuamngai takah kochuamte pauchapna Lalpa'n a pitin sak a hi. Ziagual ah a Pathian hina suklat kha a nawp lam tak ahi tile hiatthei a hi.

3. Israel chate'n Joshua mapuina ah Jeriko kul thupi tak mai a do lai ua khan, Thiampute pengkul mut git leh mipite kiko thawm mai khan Jeriko kul thupi tak mai kha a chim tha zung zung mai a hi ti i muthei ui. Ka ngaituana um ma ma khat chu, Jeriko kul thupi tak mai kha bangchan lut ah a sak uh a diam, Sakawl kangtalai pani kipeltua theina

kulbang sak zawna ding ah sum leh pai, tha leh zung, hun leh ni lut ding hih duaisan hilo hial ding a hi. Ziagual tuk ah kul lopi kisiam, Vengtu Sepai kitup tak nei, vak do zo ziang thei ding Sepai chu banggual bep in a tam diam, banggual bep matchak nei a ngai diam tite hi ngaitua na'n ka la nei sek hi. Himaleh, mihingte ngaituana khel lam ah lemguattu Pathian chun Joshua kiang in zawna thuguk a la genta, zia thuguk Lalpa apat a dawn gual ua chun Israelte chun a bawl tau a, ei uh ginchatna gual hilo tak in Thiampute pengkul mutgit leh mipite kiko thawm chun, ziagual lawm ah kul lopi chu a chimtha zung zung tamai a hi. Pengkul git leh mipi kiko thawm ah chimtha ziang thei tho tho chu, mipite tawilawk lo hial in le Lalpa'n a zo thei ma ma a hi ti a kichian hi. Himaleh, Lalpa'n vang, Joshua leh a mipite apat a thilhitheina suklat ah a um ding chu a dawizaw, thupi lo takgual ah kilang lampi a kawkmuna chun zawna le a kawi ahi ti i muthei ui. Pathian tawh nangma kikal

in banggual kiguizawpna a um em? Kiguizawpna ziagual tiang hih ka nei ui ti ah ngaidan gen ding neukhat khat bek nei chiat ngei hitiu. Nang hun mamaw lo Pathian hi in la gel em? Eima ei mamaw ngailo Pathian hileh vang, phatchuamngai tak ah i pauchap sekna te'u hih a thawm hi'ntin, a thu leh la ah i kipawlkhawm sekna te'u hile bangma lo mai hi'ngei ding a hi. Ahi'n, Lalpa'n ei mamaw hi ti i hiatziak un i pauchap ua, ei mamaw hi ti i hiatziak un panpi ngai ah i hiat te'u i zaw kham kham un i panpi sek uh a hikha. I sumisial puau in i kisik diak puau. Aziakchu, "theitawk sua ah thilpha i sepna te'u Lalpa'n a hiai" i ti'ziak uh a hi. I nasep hetu Lalpa chun, Lei mun a hilo inle Vangam ah ei dit kit ding ahi ti kinepna i nei ziak uh a hi. Kinepna ziak ah gin-um tak ah Lalpa nasemtu chun, Pathian in a lopina leh a thilhitheina suklatna ding in a mamaw zing ahi ti a hiat ziak in aum awl pua, a theitawk sua in Lalpa nasep na'n a pang ham ham sek a hi. Eden gitlona ziakah

HINNA VÂK

Setan suak ah ium lai ua khanle Lalpa'n ei hepi ma ma ziak in ei mamaw, a Chapa thisan lul tak ah chun ei hun tandawk ta a hi. Suak ngawngkawlah ah tang talo dingah ei thadaw nung vang ahin banggual bep in ei mamaw ta diam ti ngaitua thak hitiu. Insung limna ding in NANG a mamaw in, Kochuamte halthak theina ding in NANG a mamaw in, I gamsung bep hilo Khawvel pumpi ah Pathian ngaisakna a pun diak theina ding in NANG a mamaw zing ahi. Sukgentheina ziak ah Khawvel kiltin ah gingtu kithezakte kiang in Jakob chun, ***“Pathian chu nai un, tichun, ama'ne hun nai ding a hi”*** ti'n lekthawt lungsiat umtak a la thawt hi. Sukgentheina ziak ah munkhat ah umkhawm zing thei ta lo a hi'nung ua khanle, Lalpa'n a mamawna a hiatmil khak dinguh launa ziak in Pathian tawh kigamla him him lo ding in a kitil hat zel uh a hikha. Mi'n vangsiatna a tuak lai ua kipakpi sek, Insak leh thang ah suapi gual ah i la neite kinak kibau ni ah kihiatlo sak ziang i

hitawl uh em? Ama'u kiangah chamna siamtu palai ding in Lalpa'n nang hun mamaw a hi. Jakob 3:18na chun, “Dikna ga luak chu chamna tu' ahi'n, zia chun chamna a siam hi” ti'n a la gen ah, “Chuleh, la kengte'u a ding in chamna chanchinpha chu but un” Ephesa 6:15na chun kichian tak in a la gen hi. Tuni hin, a kuakte hi'dim ah, a kawite hi'zan nawpna lunggel pawlo i hui ah, midangte thangsiat zing thei ihui chun Lalpa'n ei mamaw lam kihiatlo gingtu, Mitthum hingal ah lamsau tak zawt dingah kisingsate gual mai hi ding i hui. Pawsal khat hin hivei hawilo tak mai hi a nei in, zia'h a hivei chun a phâk hun leh a chilphuante nawk in a kitel ziang sek in, Pawsal hattak mi thum leh li hial in a tûk ua lehle a zo ngai puau hi. A lei a pet in, thisan pawt zung zung in aum hial sek hi. A hinkhua chu lungsiat aum mama ziang sek hi. Nikhat chu, a inkiang-pa mai mai, midang gual ah pauchap lawting ti ah tepte le a la hingailo khat hin, Pathian min suang in, a hivei

in a phak laitak chun, a chung ah a khutngat in a pauchap piak ngut ngut ziang ta, Pawsal hivei neipa chule a hung dam ta a hi. “Ka khawhiatna umsun sun ah ka lunggel ah chun, zia’h ka hiveina apat ka hung haldaw phat leh kithat ngei ngei ding ka hi. Ziagual haksatna thawk zing hih kei di’n a haksa taluai” ti’n ka la kitiam hial ta’n, Himaleh, lei pauchap piakna apat chun damthiang ngei ding ka hitai ti chu hiatsak in ka um hi” ti’n a la gen ah, ziagualmachun, tuni tiang in zia natna hivei hawilo tak chun a pha tapuai. Zia chanchin apat i vak ngaitua ding ua pawimaw ka sak mama chu, Ziapa chu panglo ah Pathian in sudam theilo in gel kin ti hih a hi. Genesis 1:3na chun, Pathian in, Vak hung umhen” a ti’n;

tichun,vak chu a hung umtai ti imû a hi. Aum ngailo kiang ah “Um hen” ti ah umsak ziang thei Pathian chun zia’h hivei chule a hidam thei mama hi. Himaleh, Nangma ginna ziak ah Pathian thilhitheina midang kiang ah suklat ah aum chu Ama sumsialna lam a hilo ziak in NANG mamaw zing a hi. Bangmalo gual ah kigel in, Setan suak ah tang nalaite umchan gual in um tapuai tiu. Suakngawngkawl ah tang kit talo dingah ei thadawk pa i Pathian un, midangte kiangah a lopina leh a thilhitheina sulangtu di’n ei mamaw zing ahi ti ngaitua zing kawm in Ama nai in umzing hitiu. Lalpa’n simtute zosia, a lopina leh thilhitheina sulangtu hi’zing thei ding in ei malzawl chiat taken!

Pathian ah chun bang ka hi em?

- Galzotu ka hi - Ama’n ei zaw piak ziak in.
- Sukdam ka hi tai - Ama beliam ziak in
- Thilsiamthak ka hi tai - Ama’n thil zosia a siamthak ziak in
- Zalen ka hi tai - A thutak in ei zalensak ziak in.

~Heaven inspirations

INTER BRANCH BIBLE QUIZ FINAL

14th January 2022 nitak dak 06:00pm in Inter Branch Bible Quiz Competition Grand Finale chu Thangkai leh Lungpau hall Administrative Office D. Phailian ah nei a hi.

Presbytery pali a kipat audition round paltheng ah final kaidawk branch pali te; Buallian branch, Chongkhawzo branch, Kangvai branch leh P. Thianzawl branch te chu final competition dingin a hung khawm thei ua, amau branch chiat apat ngainatu mi bangzat a he'm ten le a hung uap thei ui.

Final programme ahin General secretary Tv. Lianlalsiam in vaiguan leh khiatsak ding pawimaw te puanna a nei ah, Co-Ordinator Rev. S. Lama Vaiphei in Pathian khutah kikawlsakna pauchapna nei in competition pat ngal a hi, Quiz master in Nk. Euniki imphal bial a pang ah, kigualsiakna chu round panga (5) ah khen in competitors te chu dawtna bawl a hi. Zia round te chu; Genesis, Thupuan, Hebraite, Ephesa leh Rapid fire round a hi. Dawtna panga zel branch tin te'n a dawnhu dinguh round tin in a dawng ua, Rapid fire round ahin dawtna pasagi a dawng bawkw ui.

Zia round panga apat hin branch tin te'n a point mu dan uh gawpkhawm in a tam pen apat a tawmpen puandawna General Secretary Tv. Lianlalsiam in a nei ah, zia a nuai ah gual hi a hi:

1st Kangvai Branch

Tv. Kailemsiam
Nk. Kimsiami

2nd P. Thianzawl Branch

Tv. Lallianhao Suantak
Nk. Taineihoi Suantak

3rd Buallian Branch

Tv. Kaisamlia
Nk. Hatlianiang

4th Chongkhawzo Branch

Tv. Lamneimang
Nk. Khammalzawl

February 2022

Kipakman hawpdawna Administrative Secretary Rev. P.B. Zosaphara in a nei zawm ngal ah, kipakman in

1st ₹10000 + Citation

2nd 8000 + Citation

3rd 6000 + Citation leh

4th 4000 + Citation piak a hi.

Kipakman te hawpdawna nei a hi zaw in Rev. Lalremliana Colney i/c D. Phailian Bial in Pathian kiangah kipakthu genna pauchapna a nei ah, program zaw a hi.

Tv. Lianlalsiam, General Secretary KKP
Manipur Area, Mizoram Synod

Notes:

Quiz Final program Live ah piakdaw dingah guanggalna um chu lemchan lona a um ziaik in Premiere ding zawk ah then danglam ahia, CKKP YouTube channel lam ah ngaiven dingin i kihaltsak hi. CKKP sik in la hiatthiamna'u le ka hun dawn hi.

“THILPHA HI DINGAH HUKDAM”

***Pathian in nasepdi a hun piak ahi chun, zia
sepna chu sem thei dingin thiamna leh titna
hun piakhawm ding a hi.***

~Jack Hyles



SUNNA

**REV. HESEI VAIPHEI
(1978-2021)**



Rev.Hesei Vaiphei hi Famta Pu Vumkholam leh Pi Kimkhongak te nupan kal ah piang chapa panga(5) leh chanu pathum(3) te lakah a pathum(3) channa ahia, January 1,1978 ni'n L. Munlui Khua Kangpokpi District Manipur in ala piang hi. March 13, 2019 ah khan Nk. Rebecca Hoineilam tawh kicheng in, cha leh nau gochan numei khat(1) a nei ua, a min Ngaksawmi a hi.

PATHIAN NASEPNA LAM:

Rev. Hesei Vaiphei hi Pathian nasepna lam ah chun a nasep ah tui tak a hi. January 2013 apat in Mizoram Presbyterian Kochuam ah Probationary Pastor nâ ala sem pan a, tuni tiang ahin ginum takin Pastor nâ sem in Bial ah aum sek hi. Damlona ziak in kum khat sung Office ah umsak himaleh ama dawina ngei in Bial lam ah kawi kit ahia, tuhin Leilon Pastor Bial enkawl zing kawm in a thichil a hi mai hi.

PATHIAN NASEPNA AH A LA UM TAKNATE:

Kum 2008-2012 sung Aizawl Theological College ah BD a zil zo hi. Kum 2013-2015 sung Pro.Pastor na sem in Tanhril Pastor Bial, Aizawl in aum hi. Kum 2015 Synod Kikhawmpi chun Pastor dingin a namdet hi. Kum 2016 January apat 2020

February 2022

June chan D. Khawzim Pastor Bial enkawltu in aum hi. Damlona ziakin June 2020 – December 2020 sung Manipur Area Office ah chawnlut ahia, Kum kimkhat sung a chawldam zaw ahin, Kum 2021 January apat in Leilon Pastor Bial etkawlna na a sem kit hi.

A HUN NUNUNG LAM:

Rev. Hesei Vaiphei hi taksa ah hisel lona bang bang a h'em in a bawm ah, a natna hi a zia um ziang thei taklo phat in Gilpi Cancer leh Pile natna pani thuak kawp a hi dan Doctor te apat mudaw ahia, thei dan dan ah Damdawi in leh in mun ah te in a kienkawlk sek himaleh, damdawk zo talo in December 15, 2021 (Nilaini) zingkal lam dak 8:43 in na a seppiak a Lalpa kiang ah kumtuang ah chawl dingin ei la nusia tai. Rev. Hesei Vaiphei vuiliamna hun chu Pastor Quarter T.Khawvaiphei mun ah Upa Khaiminlal Bial Chairman in thakdawna a nei hi. Mizoram Synod Moderator thasang in Rev. R. Lalhmingsanga Administrative Secretary in T. Khawvaiphei Kochuam Biak In ah vuiliamna hun mangin L. Munlai khua thanmual ah Rev. S. Lama Co-ordinator Manipur Area in hun a mang hi.

A chanchin ziktu
UPA HENTINMANG
Secretary (Sr.)
Leilon Pastor Bial

"A mithiangthote thi'na chu, Lalpa mitmu in lâl tak a hi."

Sam 116:15